

ՀԱՂՈՐԴՈՒՄՆԵՐ

ԿԱԶԱՂԱԿԱԲԵՐԴ ԱՄՐՈՅԸ

ՍԼԱԻԱ ՍԱՐԳՍԵԱՆ



Կաչաղակաբերդ Ամրոցը

Կաչաղակաբերդը *Խաչենագետի ձորահովտի նշանաւոր ամրոցներից է: Ամրոցի անուանումը կապւում է այն աւանդութեան, թէ անցեալում, պարտութիւն չտեսած եւ յամառ դիմադրութեամբ հռչակուած ամրոցի պաշտպանները, երկար ժամանակ ջուր եւ սննդամթերք չունենալով, նահատակուած են, բայց չեն յանձնուած թշնամուն: Իսկ երբ կաչաղակներն ու միւս գիշատիչ թռչունները սկսում են աղմուկ-աղաղակով պտոյտներ գործել ամրոցի վրայ, թշնամին կռահում է, որ պաշտպանները կենդանի չեն:*

Ամրոցը ընդհուպ մինչեւ ժ. դարը կոչւում էր *Խաչենի բերդ¹*, որից էլ տեղի իշխանութիւնը ստացել է *Խաչենի Իշխանութիւն անուանումը²*: ժ. դարի մի ձեռագիր յիշատակարանում ամրոցը կոչւում է *Սիսաղան Հաւքախաղաց³*, իսկ սկսած ժ. դարից՝ *Կաչաղակաբերդ⁴*:

Կաչաղակաբերդը պատմահնագիտական առումով սպառնիչ ուսումնասիրութեան չի ենթարկուել: Այն կարճաժամ պատումով ներկայացրել են Ս. Զալախանցը, Մակար Բարխուտարեանցը, Բագրատ Ուլուբաբեանը, Շահէն Մկրտչեանը⁵ եւ ուրիշներ: Ամենավաղ յիշատակագիրը Մովսէս Կաղանկատուացին է. նա ամրոցի մասին ակնարկում է հայոց Առանշահիկ եւ պարսից Միհրական տոհմերի մրցակցութեան դրուագում: Թ. դարի առաջին կէսերին, երբ այս տոհմերի միջեւ բորբոքուել էր ժառանգական մրցակցութիւնը, Ներսէս անունով մի իշխան Դադի Վանքի մօտ՝ Խորածորում, սպանում է Միհրական

տոհմից Վարագ-Տրդատ իշխանին եւ նրա որդի Ստեփանոսին՝ նպատակադրուելով ոչնչացնել այդ տոհմի արական սերունդը⁶: Սպանուածի կինը, գինուելով այրական քաջութեամբ, «առեալ զմնացեալ դուստրն իւր Սպրամ գիշերաւին տաժանելի ողետրմամբ մտանէ ի բերդն Խաչենայ՝ բարուրս խորհեալ տան իւրում ամուսնացուցանէ զՍպրամ Ատրնետի Սահլի որդոյ»⁷:

Ատրներսեհին ու նրա ժառանգներին աղբիւրները հիմնականում կապում են Վերին Խաչենի ու Ծար գաւառի հետ⁸, որտեղ «Ատրնետի շինէ զբերդն Հանդու եւ զապարանս իւր եղեալ ի գիւղն, որ կոչի Վայունիք»⁹: Բացի այդ, Թղարում Խաչենի տարածքում, մասնաւորապէս Թարթառ գետի աջ ափին, Դադի Վանքի դիմաց¹⁰ հիմնադրուում է մի այլ ամրոց, որը նոյն Հաւքախաղաց անունն է կրում¹¹: Երկու Հաւքախաղացների առկայութիւնը, ինչպէս եւ Ատրներսեհի ու նրա ժառանգների տիրապետութիւնը Ծարում եւ Վերին Խաչենում թիրախացութեան մէջ է գցել ուսումնասիրողներին, որոնք պատմագրութեան մէջ առանձնակի հետազոտման նիւթ չդարձած ամրոցի տեղադրութեան վերաբերեալ յայտնել են իրարամերժ կարծիքներ: Բարխուտարեանցը, երկելով ժամանակագրի վերոյիշեալ վկայութիւնից, Կաչաղակաբերդը իրաւացիօրէն տեղադրում է Խաչենագետի աջ կողմում, բայց առանց հիմնաւորման նոյնացում աղբիւրներում յիշատակուող Խաչենի բերդի հետ: Նա միաժամանակ ժխտում է ամրոցի Հաւքախաղաց անուանումը, գտնելով, որ վերջինս Դադի վանքի դիմացի ամրոցն է, Գրիգոր Արտներսեհեանի կառուցածը¹²: Նոյն կարծիքին է Մկրտչեանը, որը ամրոցն անուանում է Լեւոնաբերդ¹³ վերակառուցուած Կիլիկիայի թագաւոր Լեւոն Ա-ի ծախսերով¹⁴: Լէոյի եւ Բաֆֆու գործերում¹⁵ ամրոցը յիշուում է Սաղսաղան անունով, որը Ջալալեանցի կարծիքով Հաւքախաղացի թուրքերէն անուանումն է¹⁶: Ճիշտ չհամարելով Բարխուտարեանցի՝ Հաւքախաղացը նշուած վայրում տեղադրելը¹⁷ եւ չընդունելով Կաչաղակաբերդ-Խաչենի բերդ նոյնացումը, Ուլուբաբեանը գտնում է, որ Կաչաղակաբերդը նոյն Հաւքախաղացն է՝ Պատարա եւ Քոլատակ գիւղերի միջեւ¹⁸, իսկ Խաչենի բերդը գտնուում է Թարթառ-Տրտուի ափին¹⁹: Բացի այդ, վերջերս, կասկածի տակ առնելով Կաչաղակաբերդ-Սիսաղան Հաւքախաղաց-Խաչենի բերդ նոյնականութիւնը, փորձ էր արւում Խաչենի բերդը համարելու Գանձասարի դիմաց գտնուող Խոխանաբերդի հետ²⁰:

Ելնելով տեղում կատարած զննումներից ու աղբիւրների պատմահամեմատական ուսումնասիրութիւնից, եկանք այն համոզման, որ Խաչենի բերդը նոյն Կաչաղակաբերդն է եւ կարող է տեղադրուած լինել միայն Ներքին Խաչենի տարածքում (Կարկառ եւ Խաչեն գետերի միջեւ), որը բացատրւում է հետեւեալ նկատառումներով.

1. Ներքին Խաչենի վերոյիշեալ տարածքը ոչ միայն Խաչենի հնագոյն վարչական կենտրոնն էր, այլեւ արաբական տիրապետութեան ժամանակաշրջանի պատմագրութեան մէջ յիշատակուող Հայոց Արեւելից Կողմանց նշանաւոր քաղաքական գործիչների օրրանը: Հնագիտական պեղումներից յայտնաբերուած բազմաթիւ գտածոյ գինատեսակները²¹ վկայում են, որ նշուած հատուածը, լինելով երկրամասի ռազմական կարեւոր կենտրոններից մէկը, իրօք, դարձել էր իշխանների նստավայրը: Այստեղ գտնուում են ոչ միայն հին ու շատ կարեւոր նշանակութեան յայտնի ամրոցներ, այլեւ նշանաւոր վանքեր ու վանական համալիրներ, մասնաւորապէս ամրոցի դէմ-յանդիման՝

ներկայիս Քոլլատակ գիւղի մօտ գտնուող, *Խաչենի Իշխանութեան երբեմնի հոգեւոր առաջնորդանիստ կենտրոն Մեծառանից վանքը*:

2. *Խաչենի ձորակում, Խաչեն անունը հաւաստող գետակի շրջակայքում քիչ են վաղ միջնադարեան յայտնի ամրոցները, այնպիսիք՝ որոնք իրենց դիրքով, անառիկութեամբ ու յատուկ նշանակութեամբ (իշխող դիրքը Կարկառ-Խաչեն կարեւոր ռազմաառեւտրական ճանապարհի նկատմամբ) համեմատուէին Կաչաղակաբերդի հետ*:

Յայտնի է, որ աւատական իշխանութեան պայմաններում պաշտպանութեան գործում շատ յուսալի դեր էին կատարում դղեակները՝ իշխանների աթոռանիստ բնակավայրերը, որոնք բացի ռազմապաշտպանական դեր խաղալուց, նեցուկ էին աւատատէր իշխանների տիրապետութեան համար²²: Չպէտք է մոռանալ, որ Կաչաղակաբերդը, միաժամանակ, Ներքին Խաչենի ամենանշանակուող եւ ըստ էութեան միակ իշխանական դղեակն էր, որի մասին տեղեկութիւն կայ հայերէն ձեռագրերի յիշատակարաններում: Նոյնիսկ 1237ի տուեալներով, երբ Խաչենում կառավարում էր մեծանուն իշխան Հասան Ջալալը, հոգեւոր առաջնորդարան Գանձասարի նշանակուող վանքը դեռեւս գտնուում էր Սխաղան-Հաւքախաղաց-Կաչաղակաբերդի հովանու ներքոյ՝ ընդունելով վերջինիս գերակայութիւնը²³:

3. Երկու ամրոցների նոյնացումը հիմնաւորելու համար կարեւոր նշանակութիւն ունի նաեւ մոնղոլների՝ Խաչենագետի հովիտ կատարած արշաւանքի ուղու պարզաբանումը: Պատմական տեղեկութիւնները հաստատում են, որ մոնղոլ-թաթարները Խաչենի կողմերն են ասպատակել հարաւ-արեւելքից, հետեւաբար՝ Խաչեն եւ Կարկառ գետերի ուղղութեամբ²⁴: Չարմաղանի եղբայր Ջոյա գորապետը 1238ին մտնում է Խաչենի սահմանները, «ուր էր ամրոցն Խաչենոյ, յաւարի էառ զբազում տեղիս»²⁵: Հասան-Ջալալ իշխանը այդ տեսներով, իր բնակիչներով ետ է նահանջում ու ամրանում Խօխանաբերդում²⁶:

4. Ամրոցամերձ Քոլլատակ գիւղը ի սկզբանէ Խաչեն անունն էր կրում: Այս մասին վկայում է, օրինակ, տեղանունների բառարանում գետեղուած այս յիշատակութիւնը. «Խաչեն ...գիւղ Ելիգաւետալոյի ցահանգի Շուշիի գաւառում: Հաւանաբար գտնում էր համանուն գետի ափին: Ըստ մի յիշատակութեան, 1265թ. Խաչենում շինուել է Ս. Ստեփանոս անունով եկեղեցի»²⁷: Նշուած Ս. Ստեփանոս եկեղեցին Քոլլատակի տարածքում, գիւղից մօտ 5 կմ. հարաւ-արեւմուտք գտնուող նշանակուող Կօշիկ անապատի գլխաւոր եկեղեցին է, որի ՉԺԴ (1265) թուակիր արձանագրութիւնը²⁸ հարուստ տեղեկութիւններ է պարունակում Խաղբակեան տոհմի մասին, ինչ-որ չափով լրացնում նրա կենսագրութիւնը: Ս. Ստեփանոս եկեղեցին յիշատակուում է նաեւ 1471, 1473 թուակիր ձեռագիր յիշատակարաններում: Պարզում է նաեւ, որ ԺԵ. դարում Խաչենաձոր է կոչուել Խաչեն Գաւառը, իսկ Մեծառանից կամ Յակոբավանքը՝ Գետամիջոյ վանք²⁹, քանզի գտնուում է Խաչեն եւ Քոլլատակ գետերի միջեւ:

Այսպիսով, վերը վկայակոչուած փաստերը հաւաստում են, որ Խաչենի բերդը նոյն Կաչաղակաբերդն է՝ Սխաղան-Հաւքախաղացը³⁰:

Սակայն, սա չպէտք է շփոթել պատմական աղբիւրներում յիշատակուող, Թարթառի ափամերձ Հաւքախաղացի հետ: Սխալ է նաեւ վերջինիս Լեւոնաբերդ անուանումը, այն Կիլիկիայի թագաւորի ծախսերով վերակառուցելու մասին վարկածը: Իրականում Լեւոնաբերդ կամ Լեւաբերդ կոչուում է ոչ թէ Գրիգոր

իշխանի կառուցածը, այլ նրա հօր՝ Ատրնեբսեհի՝ Թ. դարի երկրորդ կեսին, վերաշինած այն հզոր ու անմատոյց ամրոցը, որ անուանում է Հանդաբերդ-«Ատրնեբսեհ շինե գրեդն Հանդու»³¹: Այն, կարծում ենք, կապ չունի Կիլիկիայի թագաւոր Լեւոնի անուան հետ (ԺԳ. դ. խառնակ ժամանակներում Լեւոն Ա-ը չէր կարող նման շինարարական գործունէութիւն ծաւալել) եւ ծագել է Թարթառի ձախ վտակ Լեւ գետի անունից ու գտնւում էր նրա աջ ափին, Լեւ եւ Չափնի աւերուած բնակավայրերի մօտակայքում, նորաստեղծ Քնարաւան գիւղին մերձ³²: Գրիգոր Տէր-Յովհաննիսեանցը համամիտ է Հաւքախաղաց, Սիսաղան, Կաչաղակաբերդ անուանումներին, ամրոցի տեղադրութեանը Խաչենագետի շրջանում սակայն, կապուած կառուցողի եւ կառուցման ժամանակի հետ, թոյլ է տալիս անճշտութիւններ: Չիշատակելով Թարթառի աջ ափին գտնուող Հաւքախաղաց ամրոցի գոյութեան փաստը եւ յենուելով Կաղանկատուացու այն վկայութեան վրայ, թէ «Գրիգոր շինե գՀաւքախաղացին բերդն, եւ յայն կողմն ձգե գծեոն իւր իշխանութեանն»³³, Կաչաղակաբերդի կառուցումը վե-րագրում է Գրիգոր իշխանին (Ատրնեբսեհեանին - Ս.Ս.), իսկ կառուցման ա-ւարտը համարում 891 թուականը³⁴:

Չի կարելի ընդունել նման տեսակէտը, թէ Խաչենի իշխանը կարող էր իր եւ նախորդների օրրանը հանդիսացող տարածքում, մասնաւորապէս՝ Խաչենագետի մօտակայքում, ամրոց կառուցել եւ «յայն կողմն» ձգել իր իշխանութիւնը: Նկատի ունենալով այս հանգամանքը, ինչպէս նաեւ պատմական աղբիւրների հաւաստի տեղեկութիւնները, գալիս ենք այն եզրակացութեան, որ առկայ է չիփթ երկու նոյնանուն ամրոցների միջեւ՝ Թարթառի Հաւքախաղացի տուեալները վերագրւում են Խաչենագետի Հաւքախաղաց-Կաչաղակաբերդին:

Խաչենի բերդը եւ համանուն իշխանութիւնն ունեցել են երեւէջներով լեցուն քաղաքական պատմութիւն: Է. դարի կէսերից Առաջաւոր Ասիայի եւ Հայաստանի համար սկսւում է պատմական մի նոր ժամանակաշրջան, երբ իրենց տիրապետութիւնն են հաստատում արաբները: Արաբական տիրապետութեան շատ ծանր տարիներին ժողովուրդը ենթարկւում էր անխնայ հալածանքների, բռնութիւնների, կոտորածների ու գերեվարութեան: Ը.-Թ. դարերում արաբներից ծանր հարուած են ստանում հայկական իշխանութիւնները, այդ թւում նաեւ Խաչենի իշխանութիւնը, որի քաջարի Առանշահիկ իշխանները (Սահլ Սմբատեան, Ատրնեբսեհ եւ ուրիշներ) ստիպուած էին անդուլ պայքարով պահպանել իրենց տիրոյթները: Այդուհանդերձ, 854ին Խաչենի իշխանութեան սահմանները մտած Բուղա ոստիկանը, կռահելով, որ Ատրնեբսեհ իշխանը ամրացել է Խաչենի ամրոցում, պաշարում է այն «եւ կալաւ գԱտրնեբսեհ եւ գագգատոնիւ նորա եւ գայլեւ երեւելի անձինս»³⁵ ու արեամբ է ողողում երկիրը: Սակայն մեզ հասած վկայութիւններից եւ նիւթական վաղեմի մշակոյթի մնացորդներից ակնյայտ է դառնում, որ, չնայած արաբների գերիշխանութեանը, այդ երկրամասը որոշակի անկախութեան շրջան է ապրել վերոյիշեալ իշխանների եւ նրանց յաջորդների տիրապետութեան տարիներին, մինչեւ սելջուկ-թուրքերի եւ մոնղոլների աւերիչ արշաւանքները: Կաչաղակաբերդ ամրոցը, որը գտնւում է Առանշահիկ տէրերի իշխանութեան ներքոյ, հեռու չէր կարող մնալ քաղաքական այս եւ յետագայ անցուղարձերից, իսկ զօրեղ թշնամու առկայութիւնը,

բնականաբար, պահանջում էր պաշտպանական միջոցներ ձեռնարկել, որին եւ ձեռնամուկս եղան այդ իշխանները:

ԺԱ. դ. երկրորդ կէսից *Խաչենի իշխանութիւնը գտնուում էր սելջուկեան տիրապետութեան տակ: Սելջուկ թուրքերի գորախումբը, ասպատակելով Խաչենը*, «էառ զամենայն ամրոցս նոցա, քակեաց զեկեղեցիսն եւ այրեաց զվանորեայսն, կոտորեաց զազատսն եւ զերեաց զգօրականսն, պէսպէս իսպառ մաշեաց զամենեսեան ատ հասարակ ի սուր եւ ի գերութիւն»³⁶: *Այսպիսի պայմաններում իշխանները, որոնք պատասպարուել էին անտառախիտ ձորերում եւ ամրացել բերդերում, չէին հանդուրժում թշնամուն եւ հերոսական մարտեր էին մղում արիւնուոչտ բռնակալների դէմ*³⁷: *Չնայած այդ ճակատամարտերի մանրամասները ժամանակագիրները չեն յիշատակել, վիճաբանական նիւթերի կցկտուր տեղեկութիւններից կարելի է որոշակի պատկերացում կազմել սելջուկ-թուրքերի դէմ պարբերաբար մղուած կռիւների մասին: Այսպէս, Խաչենի իշխանաց իշխան, Հաթիւրքի գահակալ Հասանի՝ 1182ի մի արձանագրութիւնից յայտնի է դառնում, որ նա, Խ (40) տարի (այսինքն՝ 1142-1182) լինելով Խաչենի իշխանաց իշխանը, մղել է շատ պատերազմներ եւ յաղթել իր բոլոր թշնամիներին (ամրոցն այդ ժամանակ գտնուում էր նրա գերիշխանութեան ներքոյ): «Ես Հասան, - գրել է նա, - որդի Վախտանգա, տէր Հաթերո եւ Հանդաբերդո, Խաչիմաբերդո եւ Հաւախաղացին. կացի յաւազութեան ամս Խ (40) շատ պատերազմաւ եւ յաղթեցի թշնամեաց իմոց...»*³⁸:

*1220ականներին սկսուեցին Ջալալ ադ-Դինի ասպատակութիւնները: Արաբական աղբիւրները (Իբն-Խալդուն) հաղորդում են, որ 1227ին Ջալալ ադ-Դինի վեզիր Շարաֆ ալ-Մուլքը, հարկահաւաքութիւն կատարելով, մօտեցաւ Խաչեն-Կաչաղակաբերդին, որտեղ գտնուող Ջալալ իշխանը ստիպուած էր 20000 դինար փրկագին վճարել եւ ազատել շուրջ 700 գերիներէ*³⁹:

ԺԳ. դարի կէսերին *Ներքին Խաչենը նուաճում են թաթար-մոնղոլական ասպատակները, հրի եւ սրի մատներով խաղաղ բնակչութեանը: Աղբիւրները բազմաթիւ ու հաւաստի տեղեկութիւններ են հաղորդում մոնղոլների աւերածութիւնների ու գազանութիւնների մասին: Ներքին Խաչենում մոնղոլների կատարած վայրագութիւնների մասին Կիրակոս պատմագիրը գրում է՝ «Գերեցին եւ սպանին զբազումս՝ որ յարձակ վայրսն: Ապա մարտիք մարտեան եւ զկէս բռնութեամբ իջուցին, զոր սպանին, եւ էր՝ զոր զերեցին...բայց քանզի ի տեսնեմ էր բեկումն, յեղակարծում ժամու զաղտագողի ելեալ՝ մտին յամուրսն, եւ սրոյ ճարակ ետուն զբազմութիւնն եւ զկէսն զահալէժ արարին, եւ ի բազմութեանն անկելոցն ծածկեր երկիրն, եւ արիւնն առու եղեալ իբրեւ զօր երթայր, եւ յոչ ոք խնայեցին. եւ ոսկերքն եւս յետ բազում ժամանակաց իբրեւ զբերդուկս քարանց կուտեալ երեւին»*⁴⁰:

Բացի այդ, մոնղոլների արշաւանքի եւ Կաչաղակաբերդի ճակատամարտի մասին պահպանում էր մի ձեռագիր, որի հեղինակը Գանձասարի առաջնորդ Եղիա վարդապետն է (ԺԵ. դ.): Այն կոչւում էր «Արշաւանք Թաթարաց Եւ Պատերազմ Ի Կաչաղակաբերդին»⁴¹, որը հաստատում է ամրոցի կարեւոր եւ առաջնակարգ պաշտպանական նշանակութիւնը:

Մոնղոլական տիրապետութեան սկզբնական ժամանակաշրջանում ներքին Խաչենի տէր Հասան-Ջալալը (1214-1261) իր ճկուն քաղաքականութեամբ ու

նուէրներով կարողանում է նուաճել մոնղոլ զօրապետերի վստահութիւնը, որոնք փոքրիչատէ հանգիստ են թողնում *Խաչենի բնակչութեանը*⁴² :

Քաղաքական այսպիսի պայմաններում էր գոյատեւում *Կաչաղակաբերդը*, որը, նկատի ունենալով ամրոցին վերաբերող կամ քիչ թէ շատ նրան առնչուող աղբիւրների վկայութիւնը, իր պատմական դերն ու նշանակութիւնը հիմնականում կորցրել է 1246ին⁴³, թաթարաց Ղարաբուղա զօրավարի աշխարհաւեր արշաւանքներից յետոյ⁴⁴ :

Կաչաղակաբերդը գտնուում է Պատարա (Պտրեցիք) եւ Քոլատակ գիւղերի միջեւ, դարաւոր անտառից վեր խոյսցող մի ահռելի՝ երեք կողմերից ողորկ, ուղղահայեաց քարաժայռի գլխին, ծովի մակերեւոյթից 1711 մ բարձրութեան վրայ: Աշխարհագրական-քարտիսային տեղագրութիւնը՝ N 39 58 20.0, E 46 36 53.7: «Նայում ես եւ կարծում, թէ այդ բերդը շինուած-պատրաստուած է մի ուրիշ տեղ եւ բոլորովին պատահաբար դրուած է այս սարի գլխին, իբրեւ մի գլխարկ»՝ գրում է *Լէօն*⁴⁵: Գտնուելով մօտակայ հարթավայրերից աւելի քան 1000մ բարձրութեան վրայ, գրեթէ անառիկ վայրում, ամրոցը ամենայն հաւանականութեամբ, ինչպէս Արցախ-Ղարաբաղի մի շարք ամրոցներ⁴⁶, ծառայել է նաեւ որպէս դիտակէտ՝ ազդանշանային համակարգով: Այդ է վկայում ամրոցից բացուող գեղեցիկ, լայնահուն տեսադաշտը: Հարաւային կողմում երեւում են Քիրս լեռնաշղթան, Շուշին՝ իր շրջակայքով, հիւսիսային կողմում՝ Ջրաբերդի լեռները, Առաջածորի լեռնաշղթան՝ յարակից գիւղերով, հիւսիսարեւմուտքից՝ Գանձասարը, Խօխանաբերդը, արեւմուտքից՝ Դեղ, Բերդաքար ամրոցները, արեւելքից՝ Ուրուպապի Սուրբ Գէորգի սարը, որտեղ գտնուում էր երբեմնի Պտկէս բերդը, հարաւ-արեւելքից՝ Կարկառի հովիտը՝ Քեաթուկ եւ մօտակայ այլ գիւղերով: Ինչպէս հայկական միւս ամրոցների (Ջրաբերդ, Հանդաբերդ, Գաւառգին, Երնջակ եւն.), այնպէս էլ *Կաչաղակաբերդի* բռնած տարածքն աչքի է ընկնում բնական պաշտպանական յուսալի եւ նպաստաւոր պայմաններով, շրջագծով մօտ 100 մ բարձրութեամբ երիզուած է անմատչելի մոխրակապտաւուն սեպագած ժայռապատնէշներով (դժուարանցանելի միակ մուտքը հարաւ-արեւմտեան կողմից է): Այդուհանդերձ, որեւէ այլ տեղ չենք նկատում մի այնպիսի բարձրաբերձ ու շրջակայքին իշխող ամրոց, որն իր կառուցուածքով, արտաքինապէս ու ծաւալատարածական յատկանիշներով նմանուի *Կաչաղակաբերդին*: Հարկ է ասել, որ այստեղ փայլում է ոչ այնքան մարդկային հանճարի ու հնարագիտութեան արուեստը, որքան «բնութեան ճարտարապետի» հրաշագործութիւնը:

Տեղադրուած լինելով լեռնաշխարհի գրեթէ կենտրոնում, *Կաչաղակաբերդը* *Խաչեն* արշաւող թշնամական զօրքերի առաջխաղացման գլխաւոր խոչընդոտներից մէկն էր: Գանձասարի շրջակայքում գտնուող միւս ամրոցների (Ծիրանաքար, Շիկաքար, Խօխանաբերդ, Դեղ, Բերդաքար եւն.) հետ միասին այն հզօր վահան էր ոչ միայն հռչակաւոր վանքի, այլեւ ընդհանրապէս երկրամասի պաշտպանութիւնը կազմակերպելու համար: Այս ամրոցի գրաւումը անչափ դժուար էր ոչ միայն այն պատճառով, որ թշնամին պէտք է յաղթահարէր դէպի այն տանող վերելքի խոչընդոտներն ու բնական, գրեթէ անմատչելի քարաժայռը, այլեւ պաշտպանների ցուցաբերած հայրենանուէր ու հերոսական դիմադրութեան շնորհիւ, որոնք կարող էին

հեշտութեամբ հաշիւ մաքրել յոգնած թշնամու հետ եւ նրան մեծ կորուստներ պատճառել:

Ամրոցակալ ժայռը, որ տեղաւորուած է հարաւ-արեւմուտք - հիւսիս-արեւելք ուղղութեամբ, ունի մինչեւ 135 մ. երկարութիւն եւ 62. մ լայնութիւն: Այսպիսով, ամրոցի մակերեւոյթն ընդգրկում է աւելի քան 8370 քառ. մ. տարածութիւն:



Մանրամասներ Կաշաղակաքերոյից

Ամրոցի տարածքում նկատելի են տարբեր շինութիւնների աւերակներ կամ փոստրակներ, որոնց թիւը նախնական հաշուումներով հասնում է շուրջ մէկ տասնեակի:

Ժայռամրոցի վերնամասը համեմատաբար հարթ է՝ 40 x 15 մ. չափերի (շուրջ 600քառ. մ.), որի ծայր գագաթին՝ ամրոցի ամենաբարձրագիր հատուածում, որ կազմում է 153 քառ. մ. (չափերը՝ 18 x 8,5 մ.), պահպանուում են աշտարակ-դիտակէտի աւերակների մնացորդները՝ պատի մի հատուած մինչեւ 1,2 մ. բարձրութեամբ: Այստեղ են տեղակայուած նաեւ երկու գլխաւոր, գրեթէ նոյն չափերի կցակառոյց շինութիւնների աւերակները, որոնցից հարաւ-արեւելեան կողմում գտնուողն ունի 6 մ. երկարութիւն եւ շուրջ 5 մ լայնութիւն, իսկ հիւսիս-արեւմտեան կողմինը՝ 6 մ. երկարութիւն եւ 4,8 մ. լայնութիւն: Պահպանուող պատերի բարձրութիւնը մինչեւ 1,5 մ. է, հաստութիւնը՝ 1 մետրից աւելի: Այս երկու շինութիւնները համեմատաբար լաւ են պահպանուել, ունեն իշխող դիրք ամրոցի ամբողջ տարածքի նկատմամբ եւ ամենայն հաւանականութեամբ միջնաբերդի դեր են խաղացել: Դրանք, ըստ էութեան, ծառայել են նաեւ որպէս իշխանական տներ: Եւ դա պատահական չէ. ընդհանրապէս, դեռեւս հին ժամանակներից, ինչպէս նշուեց, ամրոցամերձ տարածքը Ներքին Խաչենի շատ խիտ բնակեցուած շրջաններից մէկն էր, որի մասին վկայում են ոչ միայն դամբարանների բազմաքանակութիւնն ու դրանցից յայտնաբերուած գտածոները³⁷, այլեւ միջնադարեան վանական մի շարք համալիրների (Մեծառանից վանք, Կօչիկ Անապատ, Հաւապտուկ վանք եւն.) առկայութիւնը: Բացի այդ, յայտնի է, որ այս միջավայրում են գոյատեւել Պոռչեանց հանրայայտ տոհմի հնագոյն յի-

չատակարանները, որոնք հայագէտ Գարեգին Վրդ. Յովսէփեանցին (յետագայում Գարեգին Ա. Կաթողիկոս Մեծի Տանն կիլիկիոյ) յանգեցրել են այն եզրակացութեան, որ Պոռոշեան կամ Խաղբակեան տոհմի նախնական բնակավայրը եղել է այս վայրում, աւելի ստույգ՝ Քոլատակ գիւղը, Հաւապտուկ վանքը նրանց տոհմական գերեզմանատունն էր, իսկ նստավայրը՝ Գեռաքար գիւղը :

Հնագիտական մանրակրկիտ ուսումնասիրութիւնները, հաւանաբար, կարող են աւելի լրիւ բացայայտել հնագոյն ամրոցի պատմութեան շատ հարցեր⁴⁸ :

Ամրոցի ստորին, հիմնական մասն աչքի է ընկնում դէպի արեւմուտք կամ հարաւ-արեւմուտք ձգուող թեքութեամբ (չափերը՝ 95 x 62 մ.), որտեղ ուշագրաւ են թռուվ չորս, տարբեր չափերի ջրաւազաններ: Համեմատաբար լաւ է պահպանուած ժայռամրոցի հիւսիս-արեւմտեան եզրամասում, մասամբ ժայռափոր ջրաւազանը, որն ունի 5,6 մ. երկարութիւն, 4,2 մ. լայնութիւն եւ մինչեւ 2,5 մ. խորութիւն (բուսածածկ եւ հողածածկ է): Այստեղ են գտնուում նաեւ երկու ալլ, տարբեր չափերի (5,2 x 3,3 մ. եւ 4,5 x 3 մ.) ջրամբարներ՝ փոսորակների տեսքով: Զրամբարներից մէկն էլ տեղակայուած է ամրոցի ստորին՝ հարաւային եզրամասում, պարսպապատի մօտ (չափերը՝ 4 x 3 մ.): Պէտք է ասել, որ դրանք կառուցուել են ոչ թէ դրսից ջուր լցնելու համար, որը տուեալ դէպքում անհնարին է (ամրոցի մօտակայքի միակ աղբիւրը՝ «Սխաղանի ջուր»ը գտնուում է բաւականին հեռակորութեան վրայ, ցածրադիր վայրում), այլեւ տեղումների համար:

Կաշաղակաբերդ ամրոցի պաշտպանական համակարգում կարեւոր դեր են խաղացել ոչ միայն բնական-ժայռեղէն ամրութիւնները, այլեւ արհեստական կառուցուածքները՝ ամրոցը լիովին անմատոյց դարձնող պարսպապատերը, որոնք գրեթէ անմատչելի դիրքի շնորհիւ բաւականին լաւ են պահպանուել: Ամրոցի հարաւ-արեւմտեան կողմից մինչեւ հիւսիս-արեւելեան եզրն ընկած գօտին փակուել է մինչեւ 50 մ. երկարութեամբ ձգուող, հարաւային եւ հարաւ-արեւելեան կողմերում՝ աշտարակաւոր պարիսպներով: Դրանք պահպանուում են 1,5-1,7 մ. բարձրութեամբ եւ կենտրոնական հատուածներում ունեն 1,2-1,5 մ. հաստութիւն, իսկ հարաւ-արեւմտեան եզրամասից բացուող միակ մուտքի հատուածում, որտեղ կրկնակի ամրացուած են՝ 2,3 մ. հաստութիւն: Յատկապէս հետաքրքիր է պարսպի կամարատիպ՝ 3,25 մ. լայնութեամբ, մուտքից մօտ 10-15 մ. հարաւ գտնուող բացուածքը (պատի հաստութիւնը՝ 1,2 մ.), որը ծառայել է ոչ միայն որպէս թշնամու վրայ քարեր գլորելու «կրակակէտ», այլեւ, ըստ երեւոյթին, պաշտպանական օժանդակ դեր է կատարել: Ամրոցի պաշարման դէպքում կարելի է այդ անցքից աննկատ դուրս գալ եւ թշնամուն հարուածել թիկունքից:

Պարսպապատի գլխաւոր աշտարակը տեղակայուած է պարսպի հարաւային եզրամասում՝ ժայռի կտրուածքի վրայ: Պատերը պահպանուում են մինչեւ 2,5-3 մ. բարձրութեամբ: Ունի արտաքուստ կլոր, ներքուստ՝ ուղղանկիւն յատակագիծ (չափերը՝ 2,5 x 1,6 մ.): Միւս աշտարակը տեղադրուած է վերոյիշեալից հիւսիս-արեւելք ձգուող պարսպի վրայ, որն ըստ էութեան, ինչպէս առաջինը, դիտակէտի դեր է կատարել՝ հսկողութեան տակ առնելով ժայռ-ամրոցի հիւսիս-արեւելեան եւ հարաւային մատոյցները: Բոլոր պարսպապատերն ու նրանց առանձին հատուածները կառուցուած են

տեղական մոխրակապտաւուն եւ սպիտակ, ոչ մեծ որձաքարերով ու կրաշաղախով:

Ի մի բերելով Կաչաղակաբերդի վերաբերեալ մեր ուսումնասիրութիւններն ու դիտարկումները, կարող ենք ասել, որ ամրոցը թէ՛ պարսպապատերի եւ շինութիւնների պատերի շարուածքների ձեւերով ու բնոյթով, թէ՛ կառուցման արուեստով յիշեցնում է այս անառիկ երկրամասի միւս ամրոցները (Շիկաքար, Զրաբերդ, Դեղ, Գտչաբերդ եւն.):

Ամրոցի հետ կապուած շատ կարեւոր հարցերից մէկը կառուցման ժամանակի պարզաբանումն է: Յաւօք, դրա վերաբերեալ առայժմ արժանահաւատ եւ ստոյգ տեղեկութիւններ յայտնի չեն: Սակայն, նկատի ունենալով իրաչիկ վարդապետ Դադեանի մասնակի պեղումներն ու ուսումնասիրութիւնները իրաչեւնազետի ասիամերձ շրջաններում եւ ամրոցի մօտակայքում⁴⁹, որի ժամանակ դամբարաններից ի յայտ են եկել նիզակակոթ (երկարութիւնը՝ 18սմ.), նիզակածայր՝ կազմուած սուր սլաքանման բրոնզէ գանգուածից (16սմ. երկարութեամբ) եւ բրոնզէ գանգան գտածոներ ու խեցեղէն, կարող ենք Կաչաղակաբերդի հիմնադրումը վերագրել զարգացած բրոնզի դարաշրջանին (Ք.ա. Բ.-Ա. հազ.):

Յետագայում, արաբական ու մոնղոլական արշաւանքների ժամանակաշրջանում, ամրոցը վերակառուցուել է, յարմարեցուել տուեալ ժամանակի ռազմարուեստի պահանջներին (պահպանուած բնակարանների հետքերն ու պարսպապատերը յետագայի կառուցումների մնացորդներ են)՝ դառնալով Ներքին իրաչեւի ամենաանառիկ ամրոցներից մէկը:

Կաչաղակաբերդը նկատելի հետք է թողել հայ ժողովրդի փառաւոր պատմութեան մէջ:

ԾԱՆՕԹԱԳՐՈՒԹԻՒՆՆԵՐ

¹ Մովսէս Կաղանկատուացի, *Պատմութիւն Աղուանից Աշխարհի*, Երեւան, ՀՍՍՀ ԳԱ Հրատ., 1983, էջ 340. նաեւ՝ Մակար Բարխուտարեանց, *Արցախ*, Բագու, Արօր Հրատ., 1895, էջ 425. նաեւ՝ Հայր Միքայէլ Յովհաննէսեան, *Հայաստանի Բերդերը*, Վենետիկ, Ս. Ղազար, 1970, էջ 452. նաեւ՝ Հայր Միքայէլ Չամչեանց, *Հայոց Պատմութիւն*, Հոր. Գ., Երեւան, 1984, էջ 210 եւն.:

² Բագրատ Ուլուբաբեան, *Իրաչեւի Իշխանութիւնը X-XVI Դարերում*, Երեւան, ՀՍՍՀ ԳԱ Հրատ., 1975, էջ 45:

³ Հայերէն Ձեռագրերի Յիշատակարաններ, ԺԳ. Դար, կազմեց Ա. Ս. Մաթեոսեան, Երեւան, ՀՍՍՀ ԳԱ Հրատ., 1984, էջ 199:

⁴ Ա. Բեկնազարեանց, *Գաղտնիք Ղարաբաղի*, Ս. Պետրբուրգ, Տպ. Ի. Ն. Սխորովորով, 1886, էջ 90:

⁵ Ս. Ջալալեանց, *Ճանապարհորդութիւն Ի Մեծն Հայաստան, Մասն Ա*, Տփլիս, 1842, էջ 195. նաեւ՝ Բարխուտարեանց, էջ 197-198. նաեւ՝ Ուլուբաբեան, էջ 136, 145. նաեւ՝ Շահէն Մկրտչեան, *Լեւոնային Ղարաբաղի Պատմաճարտարապետական Յուշարձանները*, Երեւան, Հայաստան Հրատ., 1985, էջ 24-25 եւն.:

⁶ Կաղանկատուացի, էջ 340. նաեւ՝ Ստեփանոս Օրբելեան, *Պատմութիւն Նահանգին Սիւսկան, Թիֆլիս*, Տպ. Ն. Աղանեան, 1910, էջ 158. նաեւ՝ Լէօ, *Հայոց Պատմութիւն*, Գիրք Ա. Հոր. 2, Երեւան, Հայաստան Հրատ., 1967, էջ 419 եւն.։ Է. դարի սկզբին Պարսկաստանից գալիս է Միհրական տոհմի մի շառաւիղը, դառով ու նենգութեամբ կոտորում Ուտիքի Գարգման Գաւառի տէր Առանշահիկների տասնեակ տղամարդ-

- կանց եւ գրաւում նրանց տիրոջները: Այսպէս սկսուած է բնիկ հայկազուն Առանշահիկների եւ եկուոր՝ հայացած Միհրանեանների դաժան մրցակցութիւնը (Բագրատ Ուլուբաբեան, *Դրուագներ Հայոց Արեւելից Կողմանց Պատմութեան (Ե.-Ֆ. դդ)*, Երեւան, ՀՍՍՀ ԳԱ հրատ., 1981, էջ 129-130):
- ⁷ Կաղանկատուացի, էջ 340:
- ⁸ Ուլուբաբեան, *Խաչենի*, էջ 62, 71, 73: Տէս նաեւ՝ Սողք Գաւառի Մեծ Մագրա գիւղի 881ի արձանագրութիւնը (Սեդրակ Բարխուդարեան, *Միջնադարեան Հայ Ժարտարապետներ Եւ Քարգործ Վարպետներ*, Երեւան, ՀՍՍՀ ԳԱ հրատ., 1963, էջ 189):
- ⁹ Կաղանկատուացի, էջ 340:
- ¹⁰ Բարխուտարեանց, էջ 211, 427:
- ¹¹ Կիրակոս Գանձակեցին, խօսելով Խաչենի կողմերում մոնղոլների արշաւանքների մասին, գրում է, որ Խաչենի բնակիչներն ամրացել են ապահով վայրերում, «...գոր վասն դժուարութեան տեղոյնց հաւախաղաց կոչէին» (Գանձակեցի, *Պատմութիւն Հայոց, Աշխատասիրութեամբ Կ. Ա. Մելիք-Օհանջանեանի*, Երեւան, ՀՍՍՌ ԳԱ հրատ., 1961, էջ 267): Սա ըստ էութեան հիմք է տալիս ասելու, որ դժուարմատչելի ու բարձրադիր ամրոցներ տեղացիները կոչել են հաւթախաղացներ:
- ¹² Բարխուտարեանց, էջ 197-198, 211, 425, 427:
- ¹³ Մկրտչեան, էջ 37:
- ¹⁴ Գ. Տէր-Յովհաննիսեանց, «Բաղդասար Մետրոպոլիտ Հասան-Ջալալեանցի Համառօտ Կենսագրութիւնը», *Փորձ, Ազգային Եւ Գրական Միամսեայ Հանդէս*, Տփլիս, Դ. տարի, Մայիս 1880, N. 5, էջ 134, ծան. 2): նաեւ՝ Ուլուբաբեան, *Խաչենի*, էջ 248: նաեւ՝ Ջալալեանց, *Ժանապարհորդութիւն... մասն Բ*, Տփլիս, 1858, էջ 214:
- ¹⁵ Լէօ, *Իմ Յիշատակարանը*, Երեւան, 2010, թիւ 1-12, էջ 71-170: Հայոց Հոգեւոր Տեսչութեան, 1890, էջ 355: նաեւ՝ Բաֆֆի, *Պատմալի Մելիքութիւնները*, Վիեննա, Տպ. Միլիթարեան, 1906, էջ 5:
- ¹⁶ Ջալալեանց, Ա. Հտր., էջ 195:
- ¹⁷ Ուլուբաբեան, *Խաչենի*, էջ 136:
- ¹⁸ Նոյն:
- ¹⁹ Նոյն:
- ²⁰ Տէս՝ Արեքսան Յակոբեան, «Խաչենի-Խոխանաբերդ Ամրոցը Եւ Նրա Իշխանատոհմը Թ.-ԺԳ. Դարերում (Քննական Ակնարկ)», *Հանդէս Ամսօրեայ Հայագիտական Ուսումնաթերթ*, Վիեննա-Երեւան, 2010, թիւ 1-12, էջ 71-170:
- ²¹ K. Kushnareva, “Nikotoreiy Pamyatniki Epokhi Pozdney Bronzey V Nagornom Karabakhe” (Ուշ բրոնզէ դարի մի քանի յուշարձաններ Լեռնային Ղարաբաղում), *Sovetskaya Arkheologiya (Սովետական հնագիտութիւն)*, 1957, N 12, էջ 143-145:
- ²² P. Zakaraya, *Krepostnei Soorujeniya Kartli (Քարթլիի լեռնային կառոյցները)*, Թբիլիսի, 1968, էջ 6:
- ²³ Մերոպ Մաշտոցի Անուան Հին Ձեռագրերի Ինստիտուտ Մատենադարան (ՄՄ), *մանրագրաւէն-ձեռագիր*, N 612, թ. 311a-313a: Հմմտ.՝ *A Catalogue of Medieval Armenian Manuscripts in the United States*, Berkeley, Los Angeles-London, 1976: նաեւ՝ Սանճեան *Յուշակ*, N 949: նաեւ՝ *Հայերէն Ձեռագրերի*, էջ 199:
- ²⁴ Այդ մասին է վկայում մասնաւորապէս մոնղոլների՝ Հայոց Արեւելից կողմերում հաստատուելու ստոյգ վայրի բացայայտումը: Ըստ վերջերս մեր կողմից կատարուած պատմա-համեմատական եւ տեղագրական ուսումնասիրութիւնների, մոնղոլական զորամիւտերումների տեղակայման ստոյգ վայրը (կենտրոնատեղին) եղել է Խաչենագետի ստորին հովտում գտնուող Տիգրանակերտ քաղաքատեղին (Արցախի Տիգրանակերտ), որտեղից սկսուել են շրջակայ բնակավայրերի եւ յարակից տարածքների ասպատակութիւնները (Ազատ Արցախ, 27 Մայիսի, 2010, N 65):
- ²⁵ Չամչեանց, էջ 210:

- ²⁶ Նոյն. նաև՝ Գանձակեցի, էջ 269:
- ²⁷ Թ. Յակոբեան, Ստեփան Մելիք-Բախչեան, Յովհաննէս Բարսեղեան, *Հայաստանի Եւ Յարակից Շրջանների Տեղանունների Բառարան*, Հտր. 2, Երեւանի Համալսարանի Հրատ., Երեւան, 1988, էջ 665:
- ²⁸ *Դիւան Հայ Վիմագրութեան, Պրակ V, Արցախ*, կազմեց Ս.Գ. Բարխուդարեան, Երեւան, ՀՍՍՀ ԳԱ Հրատ., 1982, էջ 29:
- ²⁹ ԺԵ. Դարի Հայերէն Ձեռագրերի Յիշատակարաններ, Մաս II, կազմեց Լ. Խաչիկեան, Երեւան, ՀՍՍՀ ԳԱ Հրատ., 1958, էջ 66, 325, 344:
- ³⁰ Ի դէպ, ինչպէս վկայում են պատմական տեղանունների մանրակրկիտ ուսումնասիրութիւնները, Կաչաղակաբերդը, Խաչենի բերդ (Խաչեն), Սաղսաղան եւ Սխսաղան անուանումները իմաստային նշանակութեամբ էլ հիմնականում նոյնական են: Իրականում դրանք նոյն տեղանունն աղաւաղուած կամ ձեւափոխուած տարբերակներն են, որոնց ստուգաբանութիւնը շատ աւելի ընդգրկուն է եւ ներկայացնում է իմ «Արցախ-Ուտիք- Պատմական Տեղանուններ» դեռեւս չտպագրուած գրքում:
- ³¹ Կաղանկատուացի, էջ 340:
- ³² Բարխուտարեանց, էջ 409-410:
- ³³ Կաղանկատուացի, էջ 340:
- ³⁴ Տէր-Յովհաննիսեանց, էջ 135:
- ³⁵ Չամչեանց, Հտր. Բ, 1984, էջ 450:
- ³⁶ Հայր Ղեւոնդ Ալիշան, *Հայապատում*, Վենետիկ, Ս. Ղազար, 1901, էջ 386. նաև՝ Կաղանկատուացի, Յաւելուած Բ., էջ 351:
- ³⁷ Նոյն:
- ³⁸ *Դիւան Հայ Վիմագրութեան, V*, էջ 198: Այս արձանագրութիւնը նոյնպէս վկայում է, որ Խաչենի բերդը (Կաչաղակաբերդ) եւ Հաւքախաղացը միեւնոյն շինութիւնները չեն:
- ³⁹ I Orbeli, Asan Djalalian, Knyaz Khachenskii (Հասան Զալալեան Խաչենի իշխանը), Երեւան, 1963, էջ 152: Սակայն, մէկ այլ՝ աւելի հաւաստի տեղեկութեան համաձայն, Հասան Զալալը վճարել է նշուած փրկագնի կէսը՝ 10000 դինար, որը հաւասար է բիւզանդական 5000 սուկեայ դինարի (Shikhab Ad-Din Mukhammad AnNasavi, Jizneopisaniye Sultana Djalal AdDin Mankburni (Շիհապ Ալ-Տին Մուհամմատ Ալ-Նասաուի, սուլթան Զալալ Ալ-Տին Մանկպուրնի կենսագրութիւնը), Բաքու, 1973, էջ 211, 388):
- ⁴⁰ Գանձակեցի, էջ 267:
- ⁴¹ Բեկնագարեանց, էջ 90: Երեւանի եւ Էջմիածնի ձեռագրատներում ձեռագիրը գտնելու փորձերը արդիւնք չեն տուել: Նկատի ունենալով այն, որ պարսից խաները (մասնաւորապէս՝ Իբրահիմ) եւ նրանց կամակատարները (Մելիք Շահնագար Գ, Իսրայէլ կաթողիկոս) ժողովրդի հանդէպ գործած իրենց ոճրագործութիւնները ապագայ սերունդներին թաքցնելու նպատակով դիտմամբ ոչնչացնում էին ձեռագիր յիշատակարանները, հնարաւոր է, որ մելիքները մօտակայ քարայրներում թաքցրած լինէին որոշ ձեռագրեր, որոնց մէջ էր, գուցէ եւ, նշուած ձեռագիրը:
- ⁴² Ուլուբաբեան, *Խաչենի*, էջ 188:
- ⁴³ Չամչեանց, Հտր. Գ, էջ 222:
- ⁴⁴ Տէր-Յովհաննիսեանց, էջ 135, ծան. 1:
- ⁴⁵ Լէօ, *Իմ Յիշատակարանը*, էջ 408:
- ⁴⁶ Մկրտչեան, էջ 64-65:
- ⁴⁷ Յ. Թօփճեան, *Յուցակ Ձեռագրաց Խաչիկ Վարդապետի Դաղեան, Մասն Բ.*, Վաղարշապատ, 1900, էջ 63-74:
- ⁴⁸ Գարեգին Յովսէփեան, *Խաղբակեանք Կամ Պոռչեանք Հայոց Պատմութեան Մէջ, Մասն 1-ին*, Վաղարշապատ, 1928, էջ 34:

⁴⁹ Թօփիճեան, էջ 70-71. նաեւ՝ Հայաստանի Պատմութեան Կենտրոնական Պետական Ար-
խիւ, ֆ. 319, ց. 1, գ. 9:

THE GATCHAGHAGAPERT FORTRESS
(Summary)

SLAVA SARKSIAN

The author, a site researcher from Karabagh, brings to public attention one of the most famous fortresses of Karabagh, Gatchaghagapert.

Built on a rocky outcropping at a height of 1172 meters above sea level (some 1000 meters above its surroundings), the fortress was the major seat of the Armenian princes of the Khatchen region.

The author notes that there were two fortresses with the same name, which confused several researchers who tried to locate the fortress. Based on the archeological materials found in the fortress, Sarskian argues that the fortress was built in the late Bronze Age (2nd-1st millennium BC). He then describes the fortress's defensive mechanism, the thickness of its walls, and its size, covering an area of some 8.370 sq. meters. He also compares its characteristics with those of other fortresses of the region.

The article touches upon the history of the fortress, including its role in the defense of the region and against the invading Seljuk, Mongol and Tatar armies.